

- Puedio? - Mili sul pat de puarte di so copari Gjildo.
- Jentre, jentre - Ursule che e je daûr a messedâ la polente, pleade jù sul spangar.
- Ce frêt, ce frêt!
- Eh, no sta dîmi, o ai cjapade une disfredade jo! Che a son doi dîs che o soi plene di rafredôr!
- Ma il copari? Nol è? O ai di fâ dôs peraulis cun lui.
- Al è ancjemò inte stale, ma al dovarès rivâ dal moment.
- O voi jo inte stale.
- Ma no, no. Sta culì, scjalditi un pôc.
- Al è che o varès di viodi se par purcitâ si podarès... cuant vêso voaltris? Sabide che e ven?
- Oh! No sai jo, mi à mutivât alc, ma no sai a dîti. Fevele cun lui, velu che al ven.

E insome Mili al veve di purcitâ, a lui i lave ben di sabide, par vie che al veve a cjase so fi, ma il purcitâr i veve dit che sabide al jere li di Gjildo, ma al jere libar di joibe, e alore, copari, no podaressino gambiâ? Jo di sabide e tu di joibe? Orpo no sai, bisugne che i domandi a gno zinar se a lui i va ben, nancje jo no pues di bessôl, eh! O capîs, doman matine al varès di vignî a puartâmi lens e i dîs se o podin gambiâ, va ben, tu sâs a dîmi, sî o sai a dîti, bon grazis, o voi, ma spiete, no vino di gjoldi un tai, lassâsi cussì come cjans! Pobem! Parin jù chel tai!

Ursule saldo plete su la cjalderie, cundut il so rafredôr. Ogni tant e si russe il nâs cu la manie dal vistît e va dilunc a messedâ.

Mili le cjale come incantesemât. Ancje cuant che al à il so tai di neri in man al va di lunc a cjalâlê. Une gote menaçose e je che si pindule su la ponte dal nâs de comari. E la manie, cheste volte, no rive in socors. Ce destin varaie di vê chê gote?

E cussì, cuant Ursule i domande:

- Restistu a cene cun nô, copari?
- Ce aial di rispuindi un par om?



- Eh?
- Restistu a cene cun nô?
- Eeeh... dipint...

CovidCurte day 20 - Conte nr. 9

#969